

謚法通考

謚法通考卷之十

雲間王 圻編輯

巴郡趙可懷校正

平湖孫成泰 郢中朱

龍江王應麟 西陵吳

後梁帝后謚

肅祖姓朱氏名黯宋州碭山午溝里人開平元年追

謚宣元皇帝廟號肅祖 妣范氏謚宣熙皇后

敬祖名茂林黯子開平元年追謚光獻皇帝廟號敬

祖妣楊氏謚光孝皇后

憲祖名信茂林子開平元年追謚昭武皇帝廟號憲祖妣劉氏謚昭懿皇后

烈祖名誠信子開平元年追謚文穆皇帝廟號烈祖妣王氏單州單父人少寡携其三子傭食蕭縣劉崇家溫鎮宣武時載以歸封晉國太夫人溫未卽位先卒追謚文惠皇后

太祖名晃誠第三子初從黃巢爲盜已降唐拜宣武軍節度使賜名全忠累兼數鎮封梁王開平元年遂

篡唐而有天下乾化二年爲子友珪所弑謚神武元  
聖孝皇帝廟號太祖 張皇后碭山縣渠亭里富家  
子生末帝天福元年卒末帝卽位追謚元貞皇后

後梁臣謚

太師兼中書令贈尚書令羅紹威貴鄉人梁時謚忠  
壯

保義節度使潞州東北面招討使同中書門下平章  
事贈太師瑯琊郡王王檀京兆人始終爲梁臣貞元  
中謚忠毅

司空贈太傅長樂郡王馮行襲均州人梁時謚忠敬

後唐帝后謚

懿祖名執誼本姓朱邪唐賜姓李氏其先沙陀人同  
光元年謚昭烈皇帝廟號懿祖 妣崔氏謚昭烈皇  
后

獻祖本名赤心執誼子唐懿宗賜姓名李國昌仕至  
雁門以北行營節度使廣明二年卒同光元年謚文  
景皇帝廟號獻祖 妣秦氏謚文景皇后

太祖名克用國昌子仕唐封晉王以仍稱天祐四年

卒同光元年追謚武皇帝廟號太祖 次妣曹氏生

莊宗莊宗即位尊爲皇后同光三年薨謚貞簡

莊宗名存勗克用長子以仍稱天祐五年即晉王位  
十九年滅梁即帝位是爲同光元年四年爲伶人所  
弑謚昭宣光烈皇帝 劉皇后魏州成安人父劉叟  
善十后位次在三特以寵立有穢行明宗賜死晉天  
福五年追謚神閔敬皇后

明宗本夷狄逸佶烈氏一云代北金鳳城人姓李氏  
名亶克用養以爲子賜名嗣源莊宗時爲馬步軍總

管鎮成德同光四年莊宗崩入卽位長興四年崩謚  
聖德和武欽孝皇帝 曹皇后不見其世家謚和武  
憲皇后 夏皇后不見其世家長興元年追冊爲皇  
后謚昭懿 魏皇后鎮州平山人初適平山民王氏  
生子十歲矣是爲從珂明宗掠平山得其子母以歸  
居數年卒清泰三年追尊爲皇太后謚宣憲

愍帝名從厚明宗第五子長興四年卽位尋爲從珂  
所弑晉天福初謚愍 孔皇后父循橫海軍節度使  
后有賢行生四子廢帝從珂篡位后及四子皆見殺

晉高祖追謚哀

明宗所生祖考謚

高祖聿謚孝恭皇帝廟號惠祖

妣劉氏謚孝恭昭

皇后

曾祖敖謚孝質皇帝廟號毅祖

妣張氏謚孝質順

皇后

祖琰謚孝靖皇帝廟號烈祖

妣何氏謚孝靖穆皇

后

考失名謚孝成皇帝廟號德祖

妣劉氏謚孝成懿皇



后 俱天成二年謚

俱天後唐宗室謚

明宗姪從敏謚恭惠

後唐臣謚

唐鳳翔節度使秦王李茂貞稱臣于後唐莊宗時謚

忠敬

中書令天下兵馬副元帥太師尚書令濟王張全義

濮州人明宗時謚忠肅

平盧節度使贈太師霍彥威曲周人明宗時謚忠武

後晉帝后謚

靖祖名璟姓石氏太原汾陽里人本出於西夷天福  
元年追謚孝安皇帝廟號靖祖 妣秦氏謚孝安皇  
后

肅祖名彬璟子天福元年追謚孝簡皇帝廟號肅祖  
妣安氏謚孝簡恭皇后

睿祖名昱彬子天福元年追謚孝平皇帝廟號睿祖  
妣來氏謚孝平獻皇后

獻祖名紹雍昱子天福元年追謚孝元皇帝廟號獻

祖 妣何氏謚孝元懿皇后

高祖名敬瑭紹雍子明宗婿仕唐爲河東節度使蕃  
漢馬步軍總管末帝三年篡位天福七年崩謚聖文  
章武明德孝皇帝廟號高祖 李皇后即唐明宗女  
無謚

後晉臣謚

太子少保贈太子少傅朱漢賓譙人高祖時謚貞惠  
河東節度使贈太師康福蔚州人高祖時謚武安  
太子太保贈太子太師盧質河南人高祖時謚文忠

後漢帝后謚

文祖姓劉氏名湍太原人其先沙陀部人以仍稱天  
福十二年追謚明元皇帝廟號文祖 妣李氏謚明  
貞皇后

德祖名昝天福十二年追謚恭僖皇帝廟號德祖  
妣楊氏謚恭惠皇后

翼祖名僕天福十二年追謚昭憲皇帝廟號翼祖  
妣李氏謚昭穆皇后

顯祖名瑛天福十二年追謚章聖皇帝廟號顯祖

妣安氏謚章懿皇后

高祖名曷初名知遠仕晉拜北面行營都統封北平王以開運四年仍稱天福十二年即帝位乾祐元年崩謚睿文聖武昭肅孝皇帝廟號高祖 李皇后無謚

隱皇帝名承祐高祖第二子乾祐元年封周王是日即登帝位三年郭威犯闕遇弒謚隱

周帝后謚

信祖邢州堯山人姓郭氏名璟廣順元年追謚睿和

皇帝廟號信祖 妣張氏謚睿恭皇后

僖祖名謚廣順元年追謚明憲皇帝廟號僖祖 妣  
申氏謚明孝皇后

義祖名蘊廣順元年追謚翼順皇帝廟號義祖 妣  
韓氏謚翼敬皇后

慶祖名簡事晉爲順州刺史爲劉仁恭所殺廣順元  
年追謚章武皇帝廟號慶祖 妣王氏謚章德皇后  
太祖名威簡之子仕漢爲鄴都留守天雄軍節度使  
乾祐三年弒隱帝廣順元年即位顯德元年崩謚聖

神恭肅文武孝皇帝廟號太祖 柴皇后同郡里人

太祖即位后已先卒追冊爲皇后謚聖穆

世宗姓柴氏后兄守禮之子名榮太祖養以爲子遂

襲帝位顯德七年崩謚睿武孝文皇帝廟號世宗

劉皇后不知其世家蓋微時所娶也太祖舉兵漢誅

其家屬后見殺顯德四年追冊爲皇后謚貞惠 符

皇后父彥卿初適李崇訓崇訓以反誅世宗遂納爲

繼室即位冊爲皇后未幾崩謚宣懿

恭帝名宗訓世宗子禪於宋封鄭王開寶六年薨死謚

恭

周臣謚

東都畱守贈中書令韓國公鄭仁海晉陽人始終爲周臣世宗時謚忠正

河東行營副都部署贈侍中劉詞元城人世宗時謚忠惠

太師兼中書令瀛王馮道景城人世宗時謚文獻道歷事五朝而列在周者以周所謚也

五代僭國謚



吳王楊行密字化源廬州合肥人唐天祐二年卒私謚武忠隆演武義元年追尊爲孝武王溥僭號尊爲太祖武皇帝

渥字承天行密長子天祐二年立五年徐溫遣人縊殺之謚景溥僭號追尊爲烈祖景皇帝

隆演字鴻源行密第二子武義元年卽吳王位二年卒謚宣弟溥僭號追尊爲高祖宣皇帝

溥行密第四子武義二年襲爲王改元順義五年僭號改天祚三年禪位於齊昇卒謚睿

東海郡王徐溫字敦美海州朐山人行密起合肥以  
隸帳下後累官至大丞相都督中外軍事封王以吳  
順義十年卒追封齊王謚忠武養子李昇昇元元年  
僭號追尊爲武皇帝明年號爲義祖

南唐李恪本唐憲宗子封建王昇元二年昇推爲四  
世祖謚孝靜皇帝廟號定宗

趙恪子昇元二年追謚孝平皇帝廟號成宗  
志超子昇元二年追謚孝安皇帝廟號惠宗  
榮志子昇元二年追謚孝德皇帝廟號慶宗

昇榮子爲徐溫養子名知誥徐州人仕吳封齊王吳天祚三年受禪國號齊改元昇元二年更號唐復姓李氏名昇七年殂謚光文肅武孝高皇帝廟號烈祖后宋氏不知其世家曾在徐溫帳下後以賜昇昇受禪冊爲皇后保大三年殂謚元恭

元宗名璟字伯玉昇長子昇殂嗣位改元保大十六年改交泰元年尋奉周正朔稱顯德六年貶號爲江南國主以宋建隆元年薨乞追復帝號乃謚明道崇德文宣孝皇帝廟號元宗 妃鍾氏虔州刺史太章

之女昇元中封齊王妃嗣主即位冊爲皇后乾德三年卒謚光穆

後主名煜字重光璟第六子以宋建隆二年即位開寶九年納土封違命侯太平興國三年薨追封吳王妃周氏小字娥皇善音律尤工琵琶後主即位冊爲國后年二十九殂實宋乾德二年謚昭惠

江西道兵馬大元帥贈太弟晉王景遂昇第三子顯德五年謚文成

太師尚書令贈太弟齊王景達昇第四子開寶四年

謚孝昭

侍中贈中書令江王景逸昇第五子開寶元年謚昭  
順

太子冀璟之子交泰元年謚文獻

初有司以其靖難功謚宣武句容尉張洎上書  
以太子之德承順孝愛而已不當標顯武功以  
垂後世璟善之遂改謚

宣城公贈岐王仲宣後王子乾德二年卒年四歲謚  
獻 史臣馬令曰春秋魯君未踰年而卒者書子

卒以其不全乎君也先君未葬而嗣君卒者書于墓  
卒猶云父前子名也皆不作謚太子冀有謚固非春  
秋之法至於仲宣幼殤則又甚矣東晉瑯琊世子卒  
而賀循以爲不可作謚君子謂其知禮

中書侍郎光政殿學士贈左僕射平章事韓熙載字  
叔言北海人開寶三年謚文靖

中書令劉崇進字德脩楚州山陽人謚威

康化節度使追封弘農王楊璉吳王溥子謚靖

宏州節度使宋齊丘豫章人謚醜繆 俱南唐臣

蜀王王建字光圖許州舞陽人僖宗光啟二年帝幸興元以爲清道使昭宗天復四年封蜀王七年僭號僞光天元年薨子衍立謚爲神武聖文孝德明惠皇帝廟號高祖

後蜀王孟知祥字保胤邢州龍岡人莊宗初授成都尹劍南西川節度使明宗長興四年封蜀王明年僭號以僞明德元年薨謚文武聖德英烈明孝皇帝廟號高祖

孟昶知祥第三子明德元年立改廣政二十五年爲

宋乾德三年降於宋封秦國公七日而卒贈楚王謚  
恭孝

太師中書令宋王趙崇韜太原人謚忠武 蜀臣

南漢劉安仁上蔡人龔祖僞乾亨元年追謚文皇帝  
謙安仁子唐乾符五年爲封州刺史乾亨元年追謚  
聖武皇帝

隱謙長子謙卒代爲封州梁開平三年封南平王乾  
化元年進封南海王乾亨元年追謚襄皇帝

龔勣名儼謙庶子梁末帝初龔封南海王貞明三年



僭號改元乾亨以改大有之十五年卒謚天皇大帝  
廟號高祖

玠初名洪度襲子初封秦王已襲位改元光天二年  
爲弟晟所弑謚殤

晟初名洪熙玠弟初封晉王弑兄自立改元應乾以  
改乾和之十六年卒謚文武光聖明孝皇帝廟號中  
宗

楚馬筠許州鄢陵人後唐天成二年曾孫殷初建楚  
國因謚爲文肅

正筠子天成二年謚莊穆

元豐正子天成二年謚景莊

楚國王殷字霸圖元豐子殷起裨將唐僖宗時授馬  
步軍都指揮使昭宗乾寧四年拜武安軍節度使梁  
太祖即位封楚王後唐天成二年封楚國王長興元  
年卒詔宮爵俱高無以爲贈惟謚武穆

希範字寶軌殷第四子兄希聲立三年卒範嗣立以  
晉開運四年卒謚文昭

吳越王錢鏐字具美杭州臨安人唐僖宗乾符二年

始爲董昌都指揮使昭宗乾寧時拜鎮海鎮東節度使哀宗天祐元年封吳王梁太祖即位進封吳越王後唐明宗長興三年卒謚武肅

元瓘字明寶鏐子以鏐卒之年襲位天福六年大火燒其宮室發狂卒謚文穆

佐字祐立元瓘子立七年襲封吳越國王開運四年卒謚忠獻

次字文德佐弟佐卒弟侗以次立大將胡進思廢之次次宋太平興國三年納土端拱元年更封許王

其年卒謚忠懿

丞相林鼎慈谿人謚貞獻

丞相沈崧閩人謚文獻

威武軍節度使吳程山陰人謚忠烈

檢校太尉兼侍中鮑君福餘姚人謚忠壯

丞相鄖國公杜建徽新城人謚威烈

鎮國都指揮使睦州刺史薛溫錢塘人謚正顯

丞相曹仲達仁和人謚安成 俱吳越王臣

閩王王審知字信通光州固始人唐僖宗光啟二年

兄潮爲泉州刺史卒代立是爲昭宗乾寧四年尋拜  
武威軍節度使封琅瑯王梁太祖封爲閩王後唐同  
光三年卒謚忠懿鑄僭號之元年追謚昭武孝皇帝  
廟號太祖

鑄初名延鈞審知次子先延翰嗣位鑄弑而自立尋  
僭號以僞永祚七年爲子昶與皇城使李倣所弑謚  
惠皇帝廟號太宗

昶名繼鵬鑄長子弑父自立僞通文三年延羲令  
于繼業弑之謚康宗

曠初名延義審知少子僞永隆六年爲連重遇所弑  
謚景宗

南平王高季興字貽孫陝州硤石人本姓季後爲朱  
友讓養子又姓朱已復姓高唐天復三年始拜宋州  
刺史梁末帝時封爲渤海王後唐同光三年封南平  
王天成三年卒長興元年追封楚王謚武信

從誨字遵聖季興長子長興三年封渤海王應順三  
年封南平王乾祐元年卒贈尚書令謚文獻

保融字德長從誨第三子從誨卒拜節度使周乾德

元年封南平王宋建隆元年卒贈太尉謚貞懿

宋帝后太子謚

熙祖姓趙氏諱朶涿郡人建隆元年立四親廟追謚  
文獻皇帝 崔皇后謚文懿

順祖諱珽建隆元年追謚惠元皇帝 桑皇后謚惠

明

翼祖諱敬建隆元年追謚恭簡皇帝 劉皇后謚簡

穆

宣祖諱弘殷周龍捷左廂都指揮使始遷居洛陽建

隆元年追謚武昭皇帝 杜皇后安喜人謚昭憲

太祖名匡胤宣祖長子謚啟運立極英武睿文神德

聖功至明大孝皇帝 賀皇后閭封人謚孝惠 王

皇后新平人謚孝明 宋皇后洛陽人謚孝章

太宗名炅初名光義太祖弟謚至仁應道神功聖德

文武大明廣孝皇帝 尹皇后鄴人謚淑德 符皇

后宛丘人謚懿德 李皇后上黨人謚明德 李皇

后真定人謚元德

真宗名恒太宗第三子謚應符稽古神功讓德文明



武定章聖元孝皇帝 潘皇后大名人謚章懷 郭  
皇后太原人謚章穆 劉皇后華陽人謚章獻明肅  
李宸妃杭州人謚章懿 楊淑妃郾人謚章惠  
沈貴妃倫之孫謚昭靜

舊制皇后二謚惟劉后以稱制加爲四謚

初真宗謚號稱文翰林學士錢惟演曰真宗幸澶  
淵禦契丹盟而服之宜兼謚武下有司議乃加謚  
武定又初真宗后妃謚皆用莊字禮官呂公綽言  
孝字連太祖謚德字連太宗謚婦人從夫之謚真

宗謚章聖而曰莊非禮也遂改莊爲章以連真宗謚云

路史曰國朝四祖暨太祖太宗六后俱同廟謚獨章聖三后曰節曰惠曰莊呂公綽以爲非謂古者婦人無謚漢晉以來后謚多因于帝今與謚典不合乞追正前失從之此非也魯惠繼室號聲子聲子謚也豈惟後世哉

仁宗名禎真宗子謚體天法道極功全德神武聖文肅哲明孝皇帝 曹皇后彬之孫女謚慈聖光獻

張貴妃永安人謚溫成

苗貴妃開封人謚昭節

周貴妃開封人謚昭淑

初帝崩翰林學士王珪議曰謹按曾子問曰賤不誅貴幼不誅長禮也惟天子稱天以誅之春秋公羊說讀誅制謚于南郊若云受之于天然乾興元年夏既定真宗皇帝謚其秋始告天子圓丘史臣以爲天子之謚當集中書門下御史臺五品以上尚書省四品以上諸司三品以上于南郊告天議定然後連奏以聞近制惟詞臣撰議卽降詔庶僚

不得參聞頗違稱天之議臣今議上先帝尊謚欲望明詔有司詳稽舊典先之郊而後下臣之議庶先帝之茂德休烈有以信萬世之傳

英宗名曙初名宗實本濮安懿王允讓之子仁宗立以爲後謚體乾應曆隆功成德憲文肅武睿聖宣孝皇帝高皇后濠州蒙城人瓊之女孫謚宣仁聖烈時禮部侍郎范祖禹請易聖烈曰聖獻不從

神宗名顒英宗子謚紹天法古遵德建功英文烈武欽仁聖孝皇帝高皇后敏中孫女河內人謚欽聖

憲肅 朱皇后開封人謚欽成 陳皇后開封人謚

欽慈 武賢妃不知何所人謚惠穆

哲宗名煦神宗子謚體元繼道顯德定功欽文睿武

齊聖昭孝皇帝 孟皇后洛州人謚昭慈聖獻 劉

皇后以御侍進不知何所人謚昭懷

孟后始謚昭慈獻烈以翰林學士蔡宗禮言改謚

昭慈聖獻

徽宗名佖神宗第十一子謚體仁合道駿烈遜功聖

文神德憲慈顯孝皇帝 王皇后開封人始謚靜和

紹興中改謚恭顯 鄭皇后開封人崩於五國城紹興七年始聞其喪追謚顯肅 王貴妃不知何所人謚肅懿 帝賢妃開封人高宗母後尊爲太后謚顯仁 劉貴妃不知何所人謚明達

貴妃薨徽宗甚悲惋特加四字謚曰明達懿文後贈爲皇后止謚明達

劉貴妃本酒保家女謚明節

貴妃尤徽宗所能特謚明節懿文後用明達例贈爲皇后止謚明節

欽宗名桓徽宗子謚恭文順德仁孝皇帝 朱皇后  
開封人后北遷不知崩問慶元三年上尊號謚仁懷  
祔于太廟

諸帝謚惟太祖初謚十六字太宗真宗皆止六字  
慶曆七年加十六字仁宗至哲宗亦止六字崇寧  
四年加十六字徽宗謚乃其生時尊號因而謚之  
高宗謚則止仍六字無加也

高宗名構徽宗第九子謚受命中興全功至德聖神  
武文昭仁憲孝皇帝 邢皇后開封人崩于沙漠始

謚懿節淳熙末改謚憲節

吳皇后開封人謚懿聖

慈烈

孝宗名昀初名瑗太祖之裔高宗立爲後受內禪卽位謚紹統同道冠德昭功哲文神武明聖仁孝皇帝郭皇后開封人初謚恭懷尋改安穆又改成穆夏皇后韋州人初謚恭安寧宗時改謚成恭謝皇后丹陽人謚成肅

高宗初謚聖神武文憲孝紹熙二年加十六字孝宗初謚哲文神武成孝慶元三年加十六字



孝宗之謚孝從詹體仁議也

光宗名惇孝宗第三子謚循道憲仁明功茂德溫文  
順武聖哲慈孝皇帝 李皇后安陽人謚慈懿

初帝謚憲仁聖哲慈孝嘉泰三年加十六字

寧宗名擴光宗第二子謚法天備道純德茂功仁文  
哲武聖睿恭孝皇帝 韓皇后相州人琦之曾孫女  
謚恭淑 楊皇后或云會稽人謚恭聖仁烈

初帝謚仁文哲武恭孝寶慶三年加十六字

理宗名昀初名貴誠太祖之裔沂靖惠王繼子史彌

遠立爲寧宗後謚建道脩德大功復興烈文仁武明  
聖安孝皇帝 謝皇后天台人深甫孫女崩于北地  
無謚

度宗名叡福王與芮之子理宗姪理宗無子立爲後  
在位十年崩謚端文明武景孝皇帝 全皇后會稽  
人崩于北地無謚

恭帝名焮度宗次子降于元封瀛國公益王立于閩  
遙上尊號曰孝恭懿聖皇帝故稱恭帝 后全氏爲  
尼于元無謚

端宗名昞度宗長子母楊淑妃恭帝立封爲吉王元  
俘恭帝以去陸秀夫蘇劉義等立帝于福州建元景  
炎二年而崩時年十歲謚裕文昭武愍孝皇帝

帝昺度宗少子母俞修容始封信王又封衛王端宗  
崩群臣立帝于廣州建元祥興二年溺于海死國亡  
無謚

太子祐真宗子明道二年追謚悼獻

太子粦高宗子謚元懿

太子攄孝宗子謚莊文

太子珣藝祖十一世孫德昭之後寧宗立爲太子謚  
景獻

宋宗室謚

涪陵縣公累贈太師尚書令魏王廷美太祖弟雍熙  
中謚

廷美長子衛州防禦使樂平郡公累贈護國軍節度  
兼侍中追封高密郡王德恭明道中謚慈惠

廷美第三子保信軍節度觀察留後贈信安軍節度  
招討使追封信都郡王德異祥符中謚安簡

廷美第四子天平軍觀察留後咸寧郡公贈宣德軍節度同中書門下平章事追封廣陵郡王德雍謚康簡

追封王爵在明道中賜謚在其前

廷美第五子侍中東平郡王贈太尉中書令申王德文仁宗時謚恭裕

廷美孫保康軍留後徐國公贈彰化軍節度使安定郡王承簡英宗時謚和懿

廷美孫秦國公贈樂平郡王承亮熙寧中謚恭靖

德恭孫定武軍節度使贈開府儀同三司建國公克  
繼元祐中謚章靖

德恭曾孫唐州防禦使贈崇信軍節度使尹國公叔  
克仁宗時謚孝齊

廷美五世孫贈朝散郎直秘閣訓之謚忠果

檢校太尉贈中書令追封燕王德昭太祖子太平興  
國三年謚懿

德昭子建寧軍節度使贈侍中追封同安郡王惟正  
天聖中謚僖靖

德昭子感德軍節度使贈中書令追封南陽郡侯惟  
吉大中祥符三年謚康孝

德昭孫同知大宗正寺贈鎮江軍節度使追封丹陽  
郡王守節謚僖穆

德昭孫雄州防禦使贈保寧軍節度使楚國公從信  
謚安僖

德昭曾孫保信軍留後會稽郡王贈安化軍節度使  
開府儀同三司號王世清元封中謚恭安

德昭曾孫奉國軍留後贈開府儀同三司追封信王

世開神宗時謚廟敏

德昭曾孫知大宗正事贈太尉追封淄王世雄崇寧四年謚恭憲

德昭曾孫鎮南軍留後贈昭信軍節度使南康郡王世永熙寧元年謚修孝

德昭玄孫贈徽猷閣待制今成爲金人所獲罵而死高宗時謚愍忠

德昭八世孫少傅贈太師追封奉化郡王與懌謚清敏



從信孫保平軍節度使贈少師追封惠王令應紹興  
中謚襄靖

令應玄孫贈資政殿大學士越國公希言嘉定十七  
年謚忠憲

檢校太尉贈太師秦王德芳太祖子太平興國六年  
謚康惠

德芳孫保康軍節度使贈同中書門下平章事榮王  
從式神宗時謚安僖

德芳孫延州觀察使贈保靜軍節度使同中書門下

平章事楚國公從古仁宗時謚惠恪

從式子楚州防禦使贈固國軍節度使楚國公世恩  
哲宗時謚良僖

德芳六世孫左朝奉大夫加贈太師中書令秀王僊  
高宗時謚安僖

德芳生惟憲惟憲生從郁從郁生世將世將生  
令僊令僊生僊僊生孝宗

僊子崇信軍節度使追封崇王伯圭高宗時謚憲靖  
伯圭子檢校太保開府儀同三司克萬壽觀使崇王

追封澧王師揆嘉定七年謚恭惠

伯圭子保康軍節度使開府儀同三司崇王贈太傅  
和王師禹嘉定十七年謚端肅

提舉洞霄宮贈少師趙與憲太祖十世孫自青田徙  
居慈谿謚忠憲

天策上將軍江陵牧贈河中鳳翔牧追封齊王元佐  
太宗長子仁宗時謚恭憲

元佐子安國軍節度使贈太尉平陽郡王允升景祐  
二年謚懿恭

允升子大宗正開府儀同三司華陰郡王贈太尉滕  
王宗旦元豐中謚恭孝

允升子明州觀察使贈保寧軍節度使東陽郡王宗  
悌謚孝憲

元佐七世孫資政殿學士大中大夫贈太師福王汝  
愚徙居餘干理宗時追謚忠定

開封尹兼侍中許王贈皇太子元億太宗第二子淳  
化三年謚恭孝乾興初改謚昭成

元億嗣子代州防禦使燕國公贈靖難軍節度使新

平郡王宗保本允升弟允成之子謚恭靖

宗保子忠州團練使仲恕謚純熙

東京留守贈太師尚書令商王元份太宗第四子真宗時謚恭靖

元份子定武軍節度使贈太尉信安王允寧景祐中謚僖簡

允寧子集慶軍節度使豫章王贈太尉韓王宗諤元豐中謚榮恭僕射王珪駁之謚榮孝

元份子汝南郡王追封濮王允讓嘉祐中謚安懿

允讓子彰德軍節度使同平章事兼侍中濮陽郡王  
贈太師中書令定王宗樸神宗時謚僖穆

允讓子嗣濮王昭化軍節度使同中書門下平章事  
贈太師中書令廣陵郡王宗誼謚莊孝

允讓子嗣濮王鎮南節度使檢校司徒贈太師懷王  
宗暉紹聖中謚榮穆

允讓子武安軍節度使判大宗正事檢校司徒嗣濮  
王贈太師昌王宗晟紹聖中謚端孝

宗晟子檢校少傅泰寧軍節度使嗣濮王贈太師郇

王仲御宣和四年謚康孝

允讓子鎮安節度使開府儀同三司檢校司徒嗣濮王贈太師襄王宗愈紹聖中謚恭憲

允讓子嗣濮王河陽三城節度使檢校司徒贈太師榮王宗綽紹聖三年謚孝靖

允讓子檢校司徒武昌節度使嗣濮王贈太師惠王宗楚紹聖四年謚僖節

允讓子清海軍節度使開府儀同三司封乘城郡王校司徒嗣濮王贈太師欽王宗祐元符元年謚穆

恪

允讓子江寧保平泰寧節度使開府儀同三司檢校  
司空嗣濮王判大宗正事檢校司徒太保太尉贈太  
師景王宗漢大觀三年謚孝簡

宗漢子濟州防禦使檢校少保開德軍節度使嗣濮  
王追封瓊王仲儻紹興九年謚恭惠

允讓孫常州防禦使贈武康軍節度使洋國公仲鸞  
謚良

允讓孫彰德軍節度使開府儀同三司嗣濮王贈少



師簡王仲增政和五年謚穆

允讓孫知大宗正事嗣濮王開府儀同三司檢校少傅儀王仲湜紹興中謚恭孝

允讓曾孫崇慶軍節度使嗣濮王追封思王士儉紹興中謚溫恭

允讓曾孫知宗正事贈少師和義郡王士晤淳熙中謚忠靖

允讓曾孫贈保寧軍節度使士跋紹興末謚忠果

靖康末金人驅宗室北行士跋得間道遁去居

邢州結土豪將舉義金人覺而殺之事聞故加  
贈謚

檢校太尉兼中書令徐州大都督武寧等軍節度使  
贈太尉尚書令越王元傑太宗第五子咸平六年謚  
文惠

元傑曾孫陳州觀察使陳國公仲郃謚良僖

太尉兼尚書令贈太師尚書鎮王元偓太宗第六子  
天禧二年謚恭懿

元偓子太保鳳翔軍節度使贈太師尚書令相王允

弼熙寧二年謚考定

允弼子韓國公贈南康郡王宗績謚良孝

允弼子彰德軍節度使濟陰郡王贈太師循王宗景  
紹聖中謚思

太保贈太尉尚書令楚王元偁太宗第七子真宗時  
謚恭惠

太師荆淮節度大使贈天策上將軍徐兗二州牧周  
王元儼太宗第八子慶曆中謚恭肅

元儼子同中書門下平章事太保尚書令贈定王允

良徽宗時謚榮易

允良好酣寢以日爲夜一宮之人皆晝卧夕興  
有司以其反易晦明故謚榮易

淮南荆南節度使贈尚書令兼中書令揚荆冀三州  
牧吳王顥英宗子謚榮

太尉贈太師尚書令荆徐二州牧益王顥英宗子謚  
端獻

唐王僖神宗第三子謚恭獻

豫王侑神宗第七子謚悼惠

徐王侗神宗第八子謚冲惠

太師京兆真定尹荆揚太原興元牧贈侍中吳王佖  
神宗第九子謚榮穆

荆南武寧節度使贈太師尚書令兼中書令冀州牧  
楚王似神宗第十三子謚榮憲

越王茂哲宗子三月而夭初謚冲獻崇寧元年改謚  
獻愍

永興成德軍節度使揚州牧贈淮南武寧軍節度使  
揚州牧兼徐州牧魏王愷孝宗子謚惠獻

愷子昭慶軍節度使贈太保沂王柄謚靖惠

柄嗣子贈少師保靜鎮潼軍節度使鎮王竑本宗室

希瞿子爲彌遠所誣以非命死德祐中追謚昭肅

華王怛寧宗子早薨謚冲穆

申王懌寧宗子早薨謚冲懿

順王忻寧宗子早薨謚冲懷

肅王怕寧宗子早薨謚冲昭

宋公主謚

秦國大長公主太祖妹初適米福德再適高懷德開

寶中謚恭穆政和四年改封大長帝姬謚恭懿

荆國大長公主太祖妹未笄而夭政和中改封大長帝姬謚恭獻

魏國大長公主太祖女適王承衍大中祥符元年謚賢肅

魯國大長公主太祖女適石保吉大中祥符二年謚賢靖

陳國大長公主太祖女適魏咸信咸平二年謚貞惠後改謚恭惠

魏國大長公主太宗女適吳元扈淳化元年謚英惠  
楊國大長公主太宗女適柴宗慶明道二年謚和靖  
雍國大長公主太宗女適王貽永景德元年謚懿順  
衛國大長公主太宗女號報慈正覺大師不適人天  
聖二年謚慈明

荆國大長公主太宗女適李遵勗皇祐三年謚獻穆  
昇國大長公主真宗女號清虛靈昭大師不適人慶  
曆七年謚昭懷

周陳國大長公主仁宗女適李瑋熙寧三年謚莊孝



後改莊孝明懿

秦魯國大長公主仁宗女適錢景臻紹興中謚賢穆  
加謚明懿

魏國大長公主仁宗女適曹詩元豐六年謚賢懿徽  
宗改賢懿恭穆

燕舒國大長公主仁宗女適郭獻卿政和二年謚純  
穆改懿穆

魏楚國大長公主英宗女適王師約元豐八年謚惠  
和

魏國大長公主英宗女適王詵元豐三年謚賢惠

潭國長公主神宗女適王遇大觀二年謚賢孝

秦國長公主哲宗女適潘王夫隆興二年謚康懿

徽宗政和三年改公主號爲帝姬國號易以美  
名共三十四帝姬早亡者十四人餘皆北遷獨  
恭福帝姬生纔周晬得存耳今並不錄

周漢國公主理宗女適楊鎮謚端孝

王病時有九首烏大如箕集王家搗衣石上遂  
薨帝哭之甚哀謚端孝